

Powšitkowne WOZJEWJENJA

njedźelu, 31. januara 2021

Wusyłanje Božemu mšow

Serbskorěčnu Božu mšu móža wěriwi tutu njedźelu, 31. januara, znowa jako live-stream w interneće scěhować. Dopoldnja w 9 hodź. přenjese so wona z Chróšćanskeje, dalša hižo we 8.30 hodź. z Kulowskeje cyrkwy. Linkaj stej na internetowej stronje www.posol.de/wozjewjenej.

Swěčku postajić

„Stajimy swětło do wokna. Swětło žarowanja, swětło sobuželnosće, swětło sobučuća.“ Z tutymi słowami pozbudza němski zwjazkowy prezident Frank-Walter Steinmeier, wječor zaswěćenu swěčku do wokna stajić a z tym na zemrětych koronoweje pandemije kaž tež na jich žarowacych přiwuznych spominać. Towarstwo Cyrila a Metoda z.t. so tutej namołwje přizamkne a prosy, zo by ju telko ludźi, kelkož móžno scěhowało, zdobom pak so za potrjechenych pomodliło.

Wobsah 2020

Wobsah Katolskeho Posoła lěta 2020 je dozestajany. Wšitcy, kotřiž chcedza sej lětnik zwjazać dać a wobsah sobu zapřijeć, móža sej dataju w formaće pdf z internetoweje strony www.posol.de wućišćeć. Štóž tule móžnosć nima, njech wobroći so na redakciju Katolskeho Posoła w Budyskim Serbskim domje pod telefonowym číslom (0 35 91) 55 02 12.

Zawod do džěła pastoralnych gremijow

Džěło wosadnych pastoralnych gremijow steji w srjedzišću dweju zarjadowanjow, na kotrež přeprošuje pastoralny wotrad Drježdžansko-Mišnjanskeho biskopstwa. Wonej wotmějetej so wutoru, 2. a 9. měrca, stajnje wot 19.30 do 21.00 hodź. digitalnje přez Zoom. Nimo wuměny nazhonjenjow přěnich zetkanjow dóstanu wobdźělnicy praktiske pokiwy k džělu z nowymi porjadami pastoralnych gremijow kaž tež k wašnju džěla a tworjenju rozsudow. Swoje prašenja měli wobdźělnicy hižo do toho zapodać, na kotrež jim potom wotmołwa. Zajimcy měli so přez přizjewjenski system Eveeno přizjewić. Link na njón je pod www.posol.de podaty.

Mandželski seminar

Seminaraj k přihotej na sakrament mandželstwa wotmějetej so wot pjatka do soboty, 19. do 20. měrca, kaž tež wot 16. do 17. apryla, w Smochčanskim kubłanišću swjateho Bena. Přizjewjenja přijimuju so hač do pónđzele, 1. měrca, jeničce online na internetowej stronje dekanatneho dušepastyrstwa. Link k wotpowědnemu formularaj a k dalšim pokiwam je pod www.posol.de podaty.

Za klósterski swjedžen so přizjewić

Lětuši klósterski a swójbny swjedžen Budyskeho wokrjesa ma so njedźelu, 13. junija, wotměć. Towarstwa, kulturne skupiny, wikowarjo a wuměłcy, kiž chcedza so w klóštrje Marijinej hwězdze prezentować, měli so hač do njedźele, 28. februara, přizjewić. Přizjewjenske formulary k tomu su w interneće mjez druhim pod www.marienstern.de a www.landkreis-bautzen.de/wozjewjene.